

Betg senza ina furmaziun

Tras incumbensa pretenda Gian Michael da legalisar il transport d'animals per terzas persunas

■ (anr/ac) Il deputà Gian Michael (pbd, Schons) ha inoltrà ina incumbensa parlamentara a chaschun da la sessiun dal december dal cussegl grond cun la pretensiun da legalisar il transport d'animals en l'agricultura. Tenor las explicaziuns dal deputà na dastgan ils purs betg transportar animals per terzas persunas senza in perfeziunament professional. Il deputà Gian Michael pretenda da la renga grischuna en sia incumbensa inoltrada a chaschun da la sessiun passada dal cussegl grond dad adattar la furmaziun agricola al Plantahof pertutgant ils transport dad animals. Absolventas ed absolvents da la scolaziun purila duajan retschaiver la legitimaziun da transportar animals per terzas persunas. E vinavant vulan Gian Michael e ses cunsegnaders lubir als purs activs tals transports sin fundament da la cumpetenza ed esperienza professionala e da deliberar els dad ina scolaziun e dad ina furmaziun supplementara. Michael sa referescha en sia incumbensa a l'ordinaziun federala davart la protecziun dals animals. Ina ordinaziun che regla tranter auter il transport d'animals e circumscriba medemamain las pretensiuns vers ils manischunz u responsabels dals animals transportads. Bain sa refereschan las prescripziuns en l'ordinaziun al transport d'animals professional da transportaders e martgadants. L'ordinaziun, en vigur dapi l'entschatta da l'onn 2013, è tenor Michael actualmain valaivla suenter ina fasa da transiziun, circumscriba il transport professional fitg stretg. Uschia vala in transport d'animals d'ungla sulet per na professional sch'el vegn absolvi dal possessur da l'animal u da ses emploià. Quai tenor las explicaziuns tar l'ordinaziun da la Uniun

svizra da las veterinarias e dals veterinaris chantunals incumbensads cun l'execuziun.

Blers transports d'animals en il chantun Grischun

Gian Michael fa attent a la muntada dal transport d'animals en il chantun Grischun. Cuntinuadamain vegnian transportads animals tranter ils manschis, sin las alps, mises ed a fiera e bleras ul-

teriuras chaschuns. Blers da quels transports na vegnian betg sulet fatgs dals possessurs dals animals, mabain era sco furma d'agid vicendaivel en collavuraziun cun auters purs, scriva il deputà en sia incumbensa. Michael fa plinavant attent che blers transports d'animals en il chantun Grischun sajan transports da cuminanza cun agens ed animals da terzas persunas. Quests transports cuminaivels cun differents mezs da transport

saja dad attribuir a la structura fitg differenta en il chanun Grischun cun sia valladas allontanadas. La pretensiun da scumandar il transport d'animals da terzas persunas valitescha il deputà sco ina mesira radicala cun consequenzas economicas negativas. Gist perquai pretendan Michael e ses cunsegnaders dal chantun Grischun da lubir las pretensiuns stipuladas en l'incumbensa entaifer l'agen spazi legal.



Pretenda dal chantun da nizzegiar il spazi legal e lubir als purs transports d'animals per terzas persunas: Il deputà Gian Michael (pbd, Schons).